

求是堂文集

求是堂駢體文卷一

涇 胡承珙 墨莊

棉花賦

吉貝佳名木棉殊類自外蕃而移根植中土而得地葉密
按藍叢深剪翠絮絮雲浮花花雪墜富有埒三楮之藏奇
溫奪八蠶之利爾乃棟風過後穀雨晴初布種宜早立苗
欲疏膏鬆芳野溜決清渠籬編鹿眼之落人荷鴉背之鋤
烟扶幹直露掐尖虛綠低浮於雉翳青遙接乎蝸廬麥浪
一色桑陰藹如旣而天高霧斂野曠風寒花黏葵小實裂
桃乾搓柳綿之萬點結蘆雪之一團采復采兮翠筠籠落

未落兮銀彈九秋雨連番向隴頭而拾取夕陽一抹任屋
角之拋殘則見圃臥枯槁場平碌礪葦箔宵羅蘆簾晝曝
軋車咿啞聲在茅屋弓彈則片片瓊粧筵卷則層層玉軸
鶴氅輕堆鷺毛細簇溫如挾纈衣楚楚以思裝軟勝兜羅
手盈盈而可掬單緒合緒千條萬條燈青古壁月白今宵
噉井闌之絡緯掛網戶之蠨蛸愁長線短夢斷聲消感閨
中兮寂寞念客路兮迢遙然後牽紗著羅引經鋪牀投之
沸鼎和以輕漿冰縷一捻雲機九張梭龍騰而交錯幅鴈
陣以斜行借光陰於織素問刀尺於流黃小市抱蚩氓之
布疋檐縫公子之裳迴憶種花頃畝摘核陵陂青塍久竚

縞袂頻移配收成於玉粒比美利於冰絲祀賽黃婆之廟
寒催青女之期固可以入歛幽之譜儷織錦之詞者矣詞
曰萬紫與千紅飄零總是空能回寒谷律不必關春風重
爲系曰家家都有種花田花落花開又一年花開阡陌如
摘錦花落衣裳盡著綿

頗黎紙賦 并序

元歐陽原功圭齋集詞云花戸油牕通曉旭回寒
燠梅花一夜開金屋錢芳標純敝詞話云京師冬
月旣以紙糊窓格間用琉璃片畫作花卉人物嵌
之由室中視外無微不矚從外而觀則無所見此
歐陽楚公十二月漁家傲詞所云花戸油牕也蓋
元時習俗已尚之今京師謂之頗黎紙長畫無事
小牕多明和墨吮豪賦之云爾

斗室兮徘徊左圖史兮右尊罍朝塵塲而停几夜燈晃而
落煤聽敲砌之殘葉掃澀鋪之舊苔帳陵寒兮遲捲窓怯

冷兮難開則有巧匠裁冰良工剪水規小掾於赫蹏盪微
波於側理輕不勝吹脆難觸指鍊魚膏之瑩淨折蟬翼之
薄靡十幅則疊成雲母一片則呼來月子恰宜瑋瑁之窓
雅勝琅玕之紙於焉窸窣安樗縱橫布格空洞如無纖毫
不隔鏡嵌當心風來無噪眩油幌以微青映粉壁而純白
其內則烏皮裁几龜殼支牀鑪深聚煖簾密畱香研一泓
而澄碧筆雙管以塗黃濁酒稍酌素琴時張覺身心之清
淨愛世界之明光其外則梅蕊微含竹枝低亞雲影牆頭
天光樹罅寒山斂姿凍泉停瀉風鐸鳴殘烟帷撤乍人遙
望以目迷鳥偷窺而貌暇爾乃晨光淺淡曙色熹微霜淒

不入露泣將勝寵難偶談野馬羣飛輕霞生而納采儼日
麗而通輝夾注之書不憂其過細影榻之本無患于多肥
何綺疏之足擬赴銀案以如歸旣而連漏徐下桂魄初上
皎潔晶毬玲瓏珠網窻紙齊明波紋獨漾搖燈影以添多
撲風枝而細響恍冥身於冰壺馳廣寒之遐想若夫朔吹
旣畢韶光漸融蟄戶啟向薰籠罷烘誰云故紙猶勝輕容
草痕寫碧花朵延紅質雖輕而不損塵雖積而不蒙信乎
火齊比象水玉差同奪五色月氏之殿勝十洲方丈之宮
此亦可以隔鄭宏之座而遮滿奮之風者矣蓋物有薄而
用宐事有微而情寄伊尺寸之所施見取裁之攸利能轉

馬骨三
閨以爲明又似疏而實緻烟澹澹兮常凝水盈盈而不漬
生陋室之光輝稱小窻之位置庶沾染于芸香而不同乎
尋常之紙醉

水仙花賦

以山礬是弟梅是兄爲韻

玉骨珊珊風搖佩環伊名花之嫵娜何體靜而心閒映一
泓之盆沼倚六曲之屏山幾生清淨因緣占居水國別樣
風流名字修到仙班於時澤腹堅凍山頭薄礬霜彫離菊
雪折庭萱何來嘉種尙悶靈根斜支錦石細護珠旛清泉
暗潤旭日微溫居然水碧沙明靜夏湘妃之瑟亦復露寒
星朗深栽玉女之盆旣而瓶釋輕冰牕移遲晷東風藹然
忽動盤水根開白玉之拳葉簇青愁之指綽約芳心娉婷
纖趾裙褶徐畱襪塵微起望蹇脩而不至於意云何託微
波以通辭我聞如是爾乃棐几朝揩筠簾晝啟檢點薰爐

摩挲銅洗悲弱頻攙香清暗遞被五銖之雲霧葉綠成圍
拖六幅之瀟湘波清見底驚鴻見影疑逢宓氏之妃香草
遺名欲問女嬃之弟一枝獨出四照都開帝融異杏辦剪
欺梅亭亭倩女隱隱瑤臺七盤舞罷三島游回驪影思去
含睇若來玉釵掛未金縷提纔相賞在泉石間清供只空
琴薦不復作烟火氣前身合住蓬萊又如新月黃初叢篁
翠裏銀缸低背鏡臺斜倚望娟娟兮美人愁渺渺兮帝子
弄珠兮有光解佩兮未已歌宛在兮中央忽欲行兮又止
水哉水哉溯洄從之阻且長仙乎仙乎立而望之非耶是
脈脈盈盈其中有精聽風聽水傾國傾城豈外夷之得道

豈江斐之含情豈金堂之玉女豈瑤島之飛瓊帶烟霞兮
罨靄吸風露兮淒清指人閒兮游戲訂石上兮要盟固應
伴得梅花共喚林逋作壻怪道陰成柳絮勝他謝氏諸兄

安肅菜賦

以秀才風味菜根香爲韻

白難收時紫茄落候蓼綴露以紅疏葵經霜而綠皺愛寒
菜之盈畦傷清泉之微溜雨葉凝滋烟苗茁秀本豐潔以
諸肥尖嶙峋而筍瘦種分白菜曾聞詩客陞來名借黃芽
誤認仙家鍊就彼夫地連清苑俗異豐臺望龍山兮西指
度馬水兮東來積廣場之秫稈糝曲徑以蕪灰臨流門近
面圓軒開琅菜綺繇祇成虛語筍奴箇妾可笑凡才年年
霧夕霜晨秋光一棧處處芋疇瓜町冷玉千堆園丁是白
菜甲非紅鹿盧閒汲鴉觜新礱夜澆畚而草淨秋溼雨而
泥融蝗子勤除坐隴頭兮蕭瑟雞孫巧護織離眼以玲瓏

籌三冬旨蓄之材預防燕雪聞十倍瓜壺之利堪譜幽風
爾其陽陰敷乘時得氣裹瓠腹以皤如剝蕉心而展未
浸荒園之曉月淡白依稀暈老圃之夕陽微黃髣髴恰比
栗蒸棗脯燕趙素封何論玉鱠金齏東南佳味於焉拔共
茅連剪殊韭碎園官之歲貢如期野老則晨挑幾輩入慈
肆兮高標委豆棚兮久耐寫村居之風物筠籠頻貽隨海
國之雲帆租船滿載噉三白以無殊炊二紅而恰配雅稱
百歲之羹絕勝千金之菜乃命疏酌倒芳樽屏膏膩撤炮
燔鹽作水晶之色鼎除火氣之溫瑩鹿角之一片削龍鬚
之幾根粥香膏泛之時脆敲齒頰酒醒夢回之後清沁心

魂風雪光陰待爲冰壺作傳壺鹽滋味何堪金帳同論客
有冬心獨抱世味都忘謝棧鹿消熊之宴避肥魚大酒之
場拓蟲天於醯醢安神室於蔬腸密父飢座間之味蘋婆
畱枕畔之香相看白木瓢中嚼冰度歲安得黃金臺畔買
地鋤荒荻筍萋萋高海結遙思於鴈侶尊羹鹽豉聊償幽夢
於鱸鄉

文穎館恭進

面巡盛典表

伏以

輝騰離曜調鴻正南嚮之儀

瑞握乾符眎象法右旋之運愴

威棱于無外月嶠遙通沐

闔惠于最先雲郊近接圖呈蓋地陪玉琯以偕來

典懋巡方炳瑤函而益燦事超三古慶洽八埏臣等誠懼
誠忤稽首頓首上言竊惟雲車駕羽羣跡丹壺露幕燦蜚
書名錦帶八風入聽方牙升敷教之臺四海甄形石耳命

省方之駕覲神蹤于黃序躋岱登崆峒軼事於丹陵拜師
禮聖虞巡四仲書輯瑞以剪文周邁六師頌敬弓而偃武
甘泉鹵簿空傳漢帝之儀泰嶽緘滕莫問唐宗之冊從未
有麗禰枕被協氣棣通益神紫塞之庭問俗青邱之野跨
躡乎七十二代非繩金竦石所能詳馳驚于五三六經爲
元扈翠嬀所莫逮如

今日者也欽惟

皇帝陛下

芝庭合粹

松棟緋麻挺桐萬萌盧牟六合七曜汁雞渾之度運闡珠

囊五風鰐鳳管之音時調玉燭

椒宮鬯詠醲薰徧被于星畿

袷輅鵠行渥澤深漸于霄甸露濡寶璫

春祠升

畢陌之馨霜肅金輿

秋獮勒岐陽之碣展興桓之

奧宅戊社枌青迎津淀之

安壚丁沽水綠固已星言

命倌霓望誠民蒙純祐之駿麗會景祺之鱗晉矣乃者詩

陳太史儉首唐風禮秩奉常誠通晉望名山顯位導紫府

之勝因古佛延釐爲蒼生而錫羨繩

義后三巡之武射虎勲貽撫

軒皇六莅之儀馭龍績著簞壺竚獻子來久企於編氓桂
桓捐雕

申命先頒於臺吏諏歲辰而習吉辨朔登臺飭章亥以編
程指南駕鼓八神護

蹕鉤陳環太紫之垣

七萃連鑣壁壘簇中黃之騎

珠邱首犴儼然弓劍之思玉璣

虔將晬爾鬱蕭之氣羽林芬樹扶日月以雙輪繡甸旌闡

絢山川之五色于時青鳥司開蒼龍展閏風輕綰轄露浥
浮旌雪後三花迎

玉鑿而獻笑雲中五髻映

寶蓋以飛光挹八水于璿源默參

心印問四禪于金界湧現相輪

奎畫輝煌棖桷煥雲霞之采

天歌鞞鞞林巒發金石之音佈震旦以

鴻施檀烟市地

闡祇陀之象教花雨漫天然後

丙御星移

辰旂電轉喬雲結蔭歷三輔以承流珠斗旋杓張四維而
正建

吉行五十無愆迎送之期

盛禮三千莫罄洪纖之度若乃瀆祇効順候曉月以傳芭
屏翳揚靈祈春膏而展燎

念赤龍之啟聖稽古升禋

嘉青豸之觸邪褒忠遣奠祖寬甲帖村龙息夜吠之聲役
軫丁夫埃驚慰春翹之望

禹車暫駐赭衣雪涕以甯家

湯幣宏施韎韐雲屯而夾道黃童竹馬謹忻于薦之謳白

交黎鳩富壽華封之祝殷巡賚錫扈從虎拜于卷阿解澤
需雲愷樂燕同于在鎬鳧趨晉秩微員之姓氏咸甄鱗集
觀光多士之莛能節取廣博士青衿之額在泮歌詩比禮
官黃榜之科臨軒試賦歸來元鶴龔軒貢和伯之章作繪
華蟲黼黻佐虞廷之采於焉

文德既洽

武節是宣萬雉當關甲帥擁貔貅之隊

六龍按轡庚鈴麾鵝鸛之軍冀馬燕弧萃精良于地產參
旗井鉞陳嚴武于

天威遂乃風舉雲搖鳥旂魚頡桐生蕃殖屢豐示兆于春

臺

藻詠精詳一豫臚懽于夏諺凡此

宸游之安念悉關

帝典之喬皇

臣

等才謝七車學疎三篋紬金飾令鏤玉詳

儀際

皇輿效駕之時情殷觀聽慕儒館獻歌之盛願切編摩

八闕叢雲首振宮商之響

十行湛露全敷綸綍之華靈繹徧懷柔煩玉銷珠之禮備
戎韜資整厲攤稽撫鐸之威宣藻泮莪阿覩雲蒸於髦譽
裏銀鶴錦誌日接于蕃遮奉

屬車之清塵由庚記里第從臣之嘉頌探西陳書分列八門都爲一部卷盈廿四法時氣之回環衣被大千仰

功文之巍煥抽奇麗古旣咸五而登三鏤跡燠今將襲六而爲七是空漱諸翠檢韞以丹滕永護香芸廣頌繡梓十華剪賁鱸文龍券之宏摛萬本傳觀威鳳祥摩之爭覩臣等無任瞻

天仰

聖踴躍歡忭之至

寄洪稚存先生書

昨者幸獲捫衣猥蒙倒屣識紫芝之眉宇不愧平生藉元
暉之齒牙稍增聲價既屢邀於款曲復近接乎唱酬移樽
賓月之樓問字子雲之閣從茂叔旬月坐如在春風見太
白一流人敢談鄙事方思高言可挹飢十日而饗太牢所
恐俗學難醫期三年不近樂器談經則鐵搥未折讀史而
金根不知舉凡興圖準望之殊篆籀形聲之別莫不惑同
捫籥勞類治絲雖清酒三升膽猶未壯豈濁河千里腹果
易盈而况尺鷃不能測大鵬之飛寸莛無以發洪鐘之響
以故蓬心猶塞柄舌空存匪因寒天躅足者屢如游寶藏

空手而回豈有裨乎徒自愧耳承示小爾雅爲古籍之僅
存惜善本之難得歸而更抽子魚之緒重刊亥豕之譌未
能購逸簡以千金且欲思誤書爲一適頗揮故訓稍拾新
知而閒有所疑不能無蔽未安不知蓋闕之訓爰懷有道
就正之情不棄面牆希垂廼牖夫屑省爲過旁通方言之
義叔撫爲拾近具解字之書謂從事爲勞毛傳與合陳請
命之禮鄭志略符隲深贊明稍窺易繫曼無邵美僅見法
言此誠雅材之遺足爲藝苑之寶卽如雜采曰繪選注偶
殊寡夫曰癸詩疏微異捷接互換或取同聲度宅本通無
煩改字雖頗形其膠轕尙可識其要歸至於享當顓和轉

似取諸僞孔鄂不狼跋

謂廣訓篇以公孫爲成王

恰如故爲申毛藪二

爲缶缶二爲鍾何至新量之雜陳兩半曰捷倍捷曰舉未
見古書之所出仅四尺檠六寸惟王肅與之同船頭舳船
尾艫乃劉逵所自本而且履疑爲展詒疑爲詰苦掃葉之
益多奸或爲迂嗟或爲羌懼混珠之易眩推之道元標蒼
烏之句章懷存縞皓之文二翁二升禮疏補其脫三融六
翼史注拾其遺總此數端難求一是縱堅墨守疏通未必
其愜心况局咫聞搜緝或虞於失隄聊用掎掇以俟辨章
其有更端次於別紙擁篲而企郭璞庶許爲樊光李巡之
流挾書而問康成願附於趙商張逸之列

寄朱蘭坡編修書

人海溽暑寒鄉早秋彙筆餘暇亮惟珍攝中夏之月荐荷
手函并頒到先慈輓章等件卽日祇薦靈筵歿存甄貺素
書皮案誼重生芻形管如椽褒逾華袞其爲哀感不任下
誠山川阻深赴告多滯日月逾邁音問遂疏將俟卒哭之
期勉循執訊之義而百端交集一字不成枯墨腐豪輟者
數四累月以來淚惟洗面血盡嘔心敢因其餘略陳所苦
承琪幼多疾病長更蠢頑我生之初親年已邁先君五十
有九先慈三十又二置膝之愛固其常也折蓂之教尤有
賴焉縱爲人兄已事親之日短每嗟予季庶繞膝之期多

甫及勝冠旋遭偏露家道漸落世患厯更上谷清河門庭
非舊封胡過末羣從多貧銜索之念靡忘捧檄之心益切
於是上州覓舉入院求官敢謂四海皆知羅隱何須一第
所恐二親並歿曾參安用千鍾然而苦海無邊強臺難上
偶因一目之獲藉償十擲之鞭遂乞粟於金門且濫竽於
玉署晨夕惟念喜懼交并喜則以尺書叩閭之時稍紓暮
望懼則以寸草扶翹之日難挽春暉用是萬慮旌縣六時
鍼坐嚙指心動望雲目馳知交莫得而言魂夢不勝其苦
迎養之堂無金可築陳情之表非筆所宣逐鴈信以遄征
期烏私之急遂近鄉情怯竹幸報於平安將母恩深薪遂

忘於勞瘁方將延涼簟席取潔廁牕拾繁順之樞進羅成
之果百花生日常捧板輿三尺階前不離萊服雖使還朝
曲好招隱詞催必不願舍上壽之卮聽應官之鼓致當歸
之空寄貽慈草以多憂矣而詎知有樹當風無繩繫日神
丹不驗畫扇難留嚴霜慘而色枯寒泉凝而聲咽聽黃鸝
之唱罷痛白鶴之飛來也哉嗚呼罪也伊何我辰安在二
十喪怙三十失恃十年之中兩嬰大故尚何言哉尚何言
哉閣下懷蘊道素迴鵲上清承歡則鶴髮怡然視膳而魚
馨潔爾看見女青紅之服彈婦姑黑白之基十千沽酒而
邀朋二六練都而成賦在閣下視之不過爲有生之樂事

而自承琪望之已不啻天際之真人矣來書含廢我之深
衷致采蕭之雅意昔曹子建有云面有逸景之速別有參
商之濶謝太傅云人生如寄觸事惆悵惟以晤言銷之一
日當千載耳吾聞其語誠哉是言已矣憶樂天慈恩之游
前塵若夢借次道春明之宅後約何年楮短情長途遙意
邇此中結轡書不盡言

復家玉鑊孝廉書

兩尋德音一承篇翰如明月入裊清風與俱思心裊裊與
楮墨相陵亂寤言彷彿忘山川之阻深懷哉懷哉曷云能
已足下讀禮以來端居多暇蘭菊羅含之宅松風宏景之
樓煙雲恣其吐納圖史供其寢饋每憶鞅履相過歎關未
啟燈影射隙林鳥因而驚飛書聲琅然山風爲之落石言
念此景何時可忘近聞買棹金陵移舟武阜資江山之清
發走縞紵于東南翹首音塵實深健羨承珙樓遲人海思
求友聲而冠蓋如雲無改顧獨轅軫交錯希聞楚然何者
志趣既殊則覲面有邱山之隔道義無準則握手非雲霞

之契坐此迂疏愈成廓落碌碌如石偃偃何之授徒之餘
凝坐終歲人或半面稍閒輒忘日惟一編相對最樂所苦
心如椎鈍囊成罄縣謝仲任閱肆之聰乏春明賃宅之費
偶有造述茫無據依來教云異書如珠異人如玉兩塗斯
企一得尚難足下買書滿船結友千里撰箸益富聲氣廣
乎可傳之業已基于此名山在前當更勉之稚存先生忽
焉終古頃逢生客頗悉賤名怪北海之知劉由敬之之說
頃知己之感不能忘心足下有懷想同茲歎蘊山之變實
出意外寒家羣從首推此子蘭摧玉折悲莫甚焉舍弟餉
口維艱棲枝難定河潤不足空嗟鄭綬之儒弟名未成彌

深許武之愧猥承注問無以奉聞天運而往道阻且長比
想行旃已還故里我居日下有殘杯冷炙之悲君在山中
饒清流仄徑之趣亮惟珍攝不盡所懷新知必多幸脫一

二

寄家蓮浦孝廉書

歲聿云莫憂來無端長謠不申短晷易沒天色慘慘將雲
而風市聲嘈嘈自夕達旦寒燈如豆與夢俱搖宿火若螢
撥灰不暖飛蓬在野忽移于髣毛枯桑隔牆有如其素抱
念流水之逝景聽高鴻之響音感舊慕徒尤在足下聞足
下載書五車去家十里課讀既畢定省弗違解束脯之滿
囊邀隻雞之近局當此殘雪帶岫薄冰礙流炊烟一邨曳
若素練衰草數步潛拍碧萌時復攜榼水邊緩帶林下數
鴉幾陣簪梅半花人生故園其樂何極能不念哉能不念
哉與子別後愈益無俚骨非珊珊不及一把須始鬚鬢已

雜二色雇車而出時逢折轅贖裘而披毒苦綻線知交素
寡懷衰轉孤實恃一編藉祛萬慮伏案既久墨黏鼻端鈔
紙畢登酸徹腕下當夫半解偶獲羣疑暫開窮古今於須
臾齊得惑于一致雖塵埃凝榻蟻蝨緣領固已安之若素
樂此不疲矣回念與足下總角論交藉羶共學傲廬相望
僅容步武薄田粗給各有十雙既而迭遭參差同更憂患
漏卮不覺債臺漸高十擲無改于博韃萬言不值于杯水
君既賣宅幾欲牽船我亦待炊日惟糴米稚子有淒涼之
色孔方遺絕交之書十年之閒兩家之事莫不雲幻蒼狗
日催黃雞自此以往比率而觀亦何者非鏡裏之空花水

中之泡影也哉然而退筆成冢猶堪勒銘磨研作窪未嘗
無歲僕與足下舌耕可以得食徒步可以當車閑居送春
默坐嚮夕天地之大近在戶庭日月之明出入牖闥牀祇
七尺閣體有餘案周四隅攤書自好一牋一詠爲花招魂
半水半山如鳥悅性飲酒或醉取笑襄陽之兒識字頗多
差勝虞姬之壻古人恍其來晤後世或有相知固已蟬蛻
於清蚓用其一較負擔而逸軼埃壒而超矣彼區區揚肥
馬之塵爭瘦羊之饌曾何足以奪我所安當君一盼也哉
惟是足下長依慈竹勤采陔蘭而僕則楹書僅存鏡奩永
慕三釜之祿不逮于養一命之封徒賁于墓加以丙舍遙

隔丁男不蘇伏臘闕于躬親松楸恐其剪拜塊然羈旅頻
經歲時輒復懸旌于心承淚以睫此則僕見在所萬萬不
如足下者耳勉矣足下讀書養親努力自愛春鴻北向贈
我以言

寄湯价人師廣西書

自違雪侍遂易星躔寒鄉鴈鴻未達一字炎洲橘柚想經
五榮伏惟夫子星輶按部露冕班荆月滿珠還雲開石出
巷路歌乎賈父耕犁教於任君騎象椎牛漸弭其獷悍蠻
花狔鳥胥荷于生成側聽風猷無任忭躍承珙社櫟不斲
廚桐屢焦潦倒三秋尋知一日青山姑就東閣初窺淥水
歸艎西江旋隔粵在端蒙之歲相偕上計之人覓禪榻以
暫棲欣師門之最近旣而偶開丹鼎免脫容刀張充折節
之年幸得傳於衣鉢卻說拜筆之意況敢忘於本源方冀
絳帳終依藍輿時捧談微聆於塵拂坐詳議於蟹胥玉局

文瀾借廬陵之頭地后山句律奉南豐以心香而適值夫
子五馬遙行一麾遽出潞水之清波渺渺國門之楊柳依
依暑雨長途心隨鞭韉秋風落葉聲在河梁維時珙以愛
日情深望雲目斷上令伯陳情之表賦袁翻思歸之篇純
菜鱸魚扁舟東路白華朱鄂一曲南陔孰知微生不辰彼
蒼寂酷歸才踰月懣遽終天烏鳥深悲空懷反哺之意白
駒迅駛難畱過隙之光自此翦屏挂榻坐惟偶影芬蔽素
幌出每忘塗萬念灰心一哀刺骨頊頊然不知朝菌之晦
朔嘯蜺之春秋也每懷恩地時縈夢魂而荒山無鄰信使
難遇惟有結遙思於千里欲效鳧飛負重戴於三山自同

鼇抃而已至於去春釋服苦無入洛之貲殘臘束裝始祖
游秦之較久違雙闕忽瞻金爵子觚棱勉試五題忝授玉
堂之班秩白非無敵黃已居難帖寫輞飢樵蘇不爨行歌
偈仄徒步當車近以授經藉資餬口小山叢桂難爲承蓋
之人大厦連雲不慣掃門之跡望家山之迢遞隨人海以
浮沈卓地并歎其無錐艤舟未知於何所耳今者斗北中
繩棲身鴻廡日南開戶翹首龍門五夜星迴莫接春風之
座千灘路邈虛聞海上之琴所望夫子響洽傾風政成刻
日河南則治行第三正谷之材氣無雙於焉

丹旻書名朱轡入覲琪得與諸門生同承辟呬遞奉橋衡

庶幾病起禾醫乞參苓於藥籠暖回鄒律蘇桃李於公門
區區之懷日月以覲不盡覲縷彌深繫依

寄朱鞠萍孝廉書

匆匆把袂渺渺分袞飛絮一天故人千里別後炎風未興
伏雨尚早雞聲茅店淡月如無帽影鞭絲斜陽不下足下
與吾家兼山澍雪搜林出碣敲鞞聯陰草綠平蕪燈青古
壁指遙山之一髮渡清流之幾彎雖對此茫茫而頗不寂
寂何時水陸遞變舟車代更逐飛鳥於長淮數排簪之短
樹柳色荷香之畔萬慮忘心筆牀茶竈之間一清到骨况
復踏竹西之路乘瓜步之潮擲篴橫蕭夢醒一天煙月揚
舲擊汰眼明兩點金焦從此旅味全消鄉音漸近高堂馨
膳寸草懷春小婦新粧千花競笑招羊求於三徑松菊依

然擁蠹魚之一編風雨相對虛室生白小窗多明情在於
斯興復不淺矣承珙淨沈入海躑躅天涯我勞如何臣飢
欲从繞樹三匝觚稜之金爵何棲彈鋏一歌天廐之飛龍
不借阿婆春夢妄念先除學究冬烘生涯可笑今者槐陰
罩午蟬噪迎秋畏香土之軟紅愛睡鄉之甜黑世若大夢
日如小年惟有浩歌室中凝想天末賦淵明停雲之章詠
少陵落月之句日行南陸防酷暑之中人時因北風庶好
音之惠我

寄臨汾明府葉兩軒同年書

彼汾一曲睠懷如玉之人客來自西輒聽生塵之頌其爲
忭躍百倍恆情乃者麥氣迎秋槐陰清夏比想足下霖雨
在手薰風滿懷深隈多宵肅之漁遙村無夜吠之畜訟庭
花落囹圄草生樂何如也京師春澤稍屯夏炎浸赫圭璧
甫畢萍號遂臻所謂言未發而水旋流辭未畢而澤湧沛
影響之徵於斯可觀令郎負茲穎異當選清華無仲由率
爾之情有子勝斐然之志弟欲其兼收華實竝畫方圓經
義之暇屬以陵雲作賦快雪摹書庶幾技絕雕蟲手爲天
馬覩驀角之成於他日知鳳毛之自有由來也弟舊學將

蕪新愁漸積才本艱于上水官將改于下坡賴有素心堅
予墨守所恐青琴一曲未足移海上之情絳帳三年曾莫
益樓中之算耳風便率泐惟照不備

寄江浦司訓家翥雲書

翥雲足下離索以來歲月斯積湛湛江水客心悲其未央
嫋嫋秋風居人苦於無友有懷悵悵想彼此同之矣頗聞
足下學舍如丹職田有歲桃花饌淨苜蓿盤精問字之酒
時送於鷗夷釋奠之牲載盛之蠶器杜冠小而適稱晏喪
敝而改爲旣歡懷祿之情復協滄洲之趣亦足樂也然又
聞足下養堂未築債臺已高白雲在天瞻二親之鶴髮滄
波不極傳一弟之雁書諸生之影質無償八口之待炊孔
亟勢難毀馮驩之舊券復殷浩之空函於是仰屋咨嗟看
囊羞澀量米鹽於破甕掛薑蒜於屏風南郭之几獨凭東

陽之帶率減此其中將毋有不自適者乎然而君子固窮
達人知命處不爭之地作常調之官師以賢而得民儒多
文以爲富善舞不必長袖看射正宜短衣青氍誠耐久之
朋黃奶固佚老之具矣况復大謝爲僚小同入學西陵之
詩可獻北海之學有傳折箠不辭奴知穎士接離倒著童
笑山公何妨與世推移隨人俯仰又江浦者秣陵之近邑
淮甸之勝區也分水葉於釀泉指山條於瓜步聽隔江之
風笛望平楚之日華六朝金粉之餘五季戎馬之跡固宜
尋烟峴古醉月娛今習彼土風安茲吏隱爾僕錄著歸田
詩成感舊浮雲住世落葉徂年方冀鹿門茹芝龐妻偕老

驄馬換酒鄉友相招而下澤之樓遲未定中年之哀樂偏
多夏初玉樵之變殊非所期杯酒未寒牀琴遽撤旣痛隙
駒之速更憂巢卵之危乃者向笛方聞莊盆忽鼓山妻亡
年之病八月有凶司馬倦游家徒壁立安仁老矣簞屨休
空屋本同愁似鄭綢之失侶園非獨樂嘆君實之無家以
何言哉尚何言哉足下知僕志意何能復類昔日耶端憂
多暇頗思出遨將俟來春或訪虎林之山先探黃海或泛
鳩江之棹便弭白門彼時一葦可杭片鱗暫借孤鶩能烹
善補饋泊之過前承寄鴨一書竟歸烏有尺鯉易得不煩畫叉之錢足
下得毋疑邠老索逋之來作蘇晉逃禪之計乎羽扇拜登

蕪械爲謝順問動履伏惟善攝不宣

復韓桂舫中丞書

踐烏不淹歲月於焉永久躍鱗忽至山川忘其阻深喜心
欲飛引領無極伏惟中丞二丈閣下和春暘夏與時節宜
霖雨薰風漸被南紀際茲五管投烽十洲澄鏡鴻波息其
鯨擲象譯勸於犁耕域中無仆梁之蟻足下有生釐之大
遙想戟門晝靜鈴閣風微雅歌投壺清鑒擊鉢蓮開幕府
詩繡弓衣三百輕紅堆盤擘荔一天濃綠擲管書蕉洵良
詰之古懽太平之盛軌也承琪性拙搶榆筋駑多阜吳牛
喘暑越雞失晨彈鋏無車幸少出門之日傾樽有酒頗來
問字之人按書之課以當策勲授徒之資藉用卒歲而官

居戶限家在夢中長日如年小人近市閒愁生於仰屋敗
興甚于催租尚何能技進承蜩心專似蚓抗懷千載之上
勒成一家之言謹繕近詩十篇拙文二首略資盟噤無可
取裁孝廉葉軒素蒙識拔厚被甄陶七經爲文翁之徒一
賦受休奕之賞乃善鳴籍湜早在韓門而工相帛儀難逢
冀野今者文戰旣北俶裝遂南思覓都養之區以爲結夏
之計所覲經彥升之剪拂頓有輝光藉元暉之齒牙稍增
聲價不揣冒昧特爲敷陳伏候台祺不具

韶州途次謝韓桂舫中丞啓

琪聞采栢同材而所任者異金錫其治而所就者殊今使
植棘林於樽木之旁煽螢燿於龍燭之下固知其不可同
年而語矣然而宮徵苟合則牛鐸可以應黃鐘臭味無差
卽魚漈可以湛蘭本自來爲徐鴉而下榻聞王粲而倒屣
詠霧夕之芙蕖頓傾沈范賦新陰於桃李見賞元白古誠
有之今亦宜然閣下東吳舊望北野空羣王氏一門人各
有集蕭郎三十位已通侯入則畫省薰香出則朱轡問俗
白雲司職已高駟馬之門卿月增輝重照魚龍之國於是
交趾部民咸歌賈父天下談士願識荊州固已迓聽風聲

遙瞻斗氣矣接侍以來欽挹彌至竊見閣下正色率屬和
神當春本其慈仁則吐茵不怒用其聰察則攫肉無欺戮
橫海之魴鯢全資坐鎮掃潰隄之螻蟻幾費宵籌而乃風
月南樓不減庾公之興裙屐東山無改謝傅之樂諷詠倍
於書生被服依然儒素求之今世罕有其儔珙襪線微才
囊錐鈍質金門小隱虛竊斗升玉節初頒濫持衡尺三條
燭盡憶我當年五色目迷眩人此日猥蒙閣下寬其禮數
優以餽饗催試詩成念白袍之如鵠報羅期緩懼赤水之
遺珠月盡瑣闥看堆於落紙霜清廳館預約于題衿遂使
鯢生呈其颺技一篇跳出隔簾而急遞郵筒三疊唵完按

拍而如聞鞠部由是高軒過戶獲承華裾之輝巨及摩天
却賞玉川之句忘爵齒之爲貴折輩行而與交豈抱雄心
輒賜以階前之地未諳雌霓乃示以郊居之篇古稱張率
之文固必求名于沈約而敬禮之作亦嘗待定于陳思以
今方之不且有同揆歟自違左右爰歷津郵買花數盆堆
書盈几青山無恙猶認白雲綠樹不凋轉思紅葉蓬牕偶
啟奇石突如其來鞏間沿緣好風忽而相送以月之某日
遂抵曲江回首望龍門之高攀援何幸發篋誦河梁之什
惆悵無窮自顧儒冠甚愧丈人之厚聊持紈扇奉揚君子
之風謹同疊韻藉作報章熱鄉晚秋公餘清暇懷素道沖

駢體文

卷一

亮惟頤攝不宣

約同人七月五日爲鄭康成生日設祀啟

昔樊侯作誦必推申甫之生臧生噉經厥有庚子之拜炳
諸往古沿逮今茲漢大司農北海鄭君道亞生知照隣殆
庶囊括大典罔羅衆家鈎河摘雒之精起廢箴育之要信
乎大雅之懿通人之冠矣若乃嗇夫捧檄已安里閭賊徒
戢戈不入縣境本初敗虜致敬於東州仲瑗宏通願居於
北面此其所以布衣雄世高車式門者也屬冀部迫豺虎
之災致賢者厄龍蛇之讖而遐稽別傳用綴遺聞當永建
之二季實覽揆于初度七月曰相五日爲期是則流火乍
逢輒抒懷舊之念範金欲事必依通德之門者矣夫禮隆

降誕於古無徵而哲命初生其時宜謹懿夫閭史藏書禮
堂所寫陳醪介壽幽雅是分苟義據之昭通儻神靈之憑
鑒我等高山是仰同志爲朋願逐後車之塵敢忘豆間之
祭比諸舍菜雖芹藻而可將相約合錢貴束脩之自致庶
幾辦香有在歸於六藝之文靈風灑然歆茲一斛之醕

約同人邑邸看花啟

塵海希暇寒鄉晚春雨少風多迎遲饒速前此圖消九九
仍餘梅萼之香及茲節屆三三又憶薺花之唱和風拂面
幽事關心方將緩帶荒垌敲扉堊寺散馬蹏而踏草逐蝶
影而過橋追唐人曲江之期展宋代上河之畫興發起古
情盤蕩今矣況乃長安賃春小人近市風雨託會稽之邸
慈龍成庾信之園酒堪過于牆頭觴宜飛于月下不腆做
邑寄微粟於滄溟庶幾同人錫名篇之珠玉三間足茲將
沿因樹之稱一醉無名欲仿借花之例

募修魁星閣疏

昔河圖告期姚黃稔其符瑞并絡建福楊馬載其英靈或
氣潤如珠或形明似月黎閭騰輝於太乙管城耀彩於長
庚凡茲列宿之精並具通靈之感況夫大辰爲忠良之象
枕首無偏天府有祿命之司戴匡可驗此吾村魁星閣所
由建也瑯琊家世夙擅雕蟲鄴下門閭慣施行馬地是集
賢之里人推交讓之鄉綠樹連村樓臺三面青山作障烟
火萬家則有傑構再重危枕百尺丹甍冠日碧檻籠雲交
綺豁以疏寮紛斑華於倒井登斯樓也舉手可摘捫胸自
羅香煙隨林霏其扁鈴鐸與溪響互荅橋非虹而自矯田

似郢以俱平春葩則攬地千紅秋卉則黏天一碧酒旗風
影颺入中流僧寺鐘聲傳來夜半信里譙之勝游郊居之
壯觀也然而古殿徒歸高臺易傾飛檐轆轤以將頽浮柱
茗茗而欲動承塵穿漏星明朱鳥之窗關角欹斜雨壞白
蜺之室歎畫棟珠簾之非昔望雲車風馬以何如彼夫魁
首崢嶸雖衆材其可踐何至閣中寂寞翫一木之難支文
昌所以莫保其常明廉貞所以致怒於不享也有其舉也
莫敢廢之揆厥所宜用陳茲略夫郊詵及第尚拜龍鬚孝
穆降生原由麟種逢黃衣之送榜夢朱筆之點頭桺汁濃
青指頻彈於九烈蕊宮淡墨字待署於三清故鍾馗以進

士稱神畫圖依舊亞子爲狀元作賦尸祝方新此閣之空
修者一也況夫沛口潮通祥徵閣老縣前灘漲瑞應臺臣
舍衛垣墉尙藉浮圖作鎮遼陽城郭猶憑華表知歸誌洛
陽之仰藍頗關興廢望繁樓之燈火並係觀瞻設使棹楔
無存孰識鳴珂之里蘭綺不設誰知刻戟之門此閣之空
修者二也而且其下則白沙翠竹路本通村浪絮飛花亭
原送客丹溪一曲月印波心黃峴千尋雲齊峯頂登高作
賦流連文酒之歡臨水生愁牽惹江湖之夢蘄子訓摩挲
銅狄珍重何如王延壽抒寫靈光咨嗟未已此閣之宜修
者三也執此數端並須建置豈容積日漸任頽唐然而上

界官多下方地窄天錢不借月斧無功塔造四層未必金
輪自具觀成一夕可真玉棟飛來五角六張尙恐成難而
廢易南箕北斗未免少實而多虛爰憑文字之靈遂託神
明之鑒勝因有在何如捐長者之金善果無邊匪止捨梵
王之宅力羣扶而易舉不藉他楊兆有開而必先試徵叢
桂但使瓊梯紺榭闌道穹窿庶幾井鉞參旗神來髣髴鳴
呼儒風淡薄有時亦貴多金仙籍虛無此事尤關冥注爲
問大羅天上幾回聞管籥之音何妨小叔人間一變換亭
臺之色

北堂詩錄題辭

北堂詩錄者同年張愛濤大令輯其母左太安人作也夫
銘椒頌菊非無黃絹之辭釵鳳鏡鸞易入紅牋之格然而
盤中織錦祇費柔情扇上裁絇徒工幽怨豈若正色端操
垂誠女之七篇輔信佑貞著隨子之一賦足以壽之竹素
煒我管彤也哉太安人冑延倚相兄是太沖能報大雷之
書善道密雪之狀旣而歸我年丈某公則宰相五世孫也
華族蟬聯高門鼎貴金釭銜壁玉鏡裝臺宜其刻翠裁緇
寫貴香奩之集吹花嚼蕊製成錦軸之書矣而太安人以
爲緣情綺靡非德象之所存卽景流連豈閭言之宜出故

依謝家之樹祇頌清風采秦氏之桑不歌初日蓋自纚笄
事舅國被勦夫雖從宦得江山之勝在公懷蘋藻之香惟
致謹于遽筐不自誇夫蠶曰及至楹書授讀府檄怡顏伯
虎仲熊並驥衢路燕雲秦樹爭逐板輿於是葉縣乘鳧潯
池卻鮒察善果之斷事教崔實以臨民或親賜之帶輦或
遙傳于簡札往往連章申誠短詠述懷此則字字珠璣言
言栗帛秦姬訓子常各佩以韋絃敬姜勸兒惟取罄于幅
畫者矣茲愛濤以三春暉永之期爲太安人八旬壽曼之
慶張孟遷階而獻爵崔邠觀樂而導輿謂官物非所以承
歡而慈訓實堪以壽世是用登諸繡梓寄自郵筒將廣集

于徽言俾共宣夫懿渠承琪傾東海之風匪歆萬石慕北
堂之義獲覩一編足知書到大家不徒重玉臺之詠倘使
傳成中壘更宜紬金鑱之藏

求是堂駢體文卷一終